



Meeri ni kamwane iaon te intanete

E a bon mwaiti ngkai te ririki n nonoraki meeri ni kamwane ao n aonikai iaon te intanete aika a kona n tangira aram ma nambwan am akaunti n te bangke, n aron anne. A bakaee te roko meeri aikai man tain bangke, tabo n tau mwiin taekiti, ao ana rabwata te tautaeka riki tabeua aika a kinaaki. E bon teimatoa naba ngkai n ataaki taekan waaki ni kamangao aikai irouia aomata; ao antai ae e na atia, ngaia tao e a raka riki tanoatana irouia ke imarenaia taan kamwane n aonikai.

Kinaakin meeri ni kamwane iaon te intanete

- A kaota te tabo ae e kona n reke iai te tia kanakoa te meeri ae e okoro ma ana tabo n reitaki te rabwata, ane e oti n te meeri, ae e kinaaki iaon te intanete.
- N tabetai, a aki kabongonaa aram ma a kabonganai taeka ni kamauri n aron "Mauri ara katitamwa", "Mauri te Tia Bitineti", "Mauri te Tia kabwaka taekiti" ke n tabetai akea naba taeka ni kamauri.
- N angjin te tai a bon kataenoako naba bwa ko na karaoa te bwai are a tangiria. N aron katootoo aikai, ngkana ko aki karaoa ngkai te bwai ae ko tuangaki ao e na kainaki am akaunti n te bangke, ke tao ko na aki kauiaa tain te mwane ae e na kabwakaaki nakoim ke tain kabwakaan boon mwiin am mwane, ke tao ko na aki anganaki te bwai n tangira nakoim ae ko aki kona ni katuankaoa.
- A bubutiko rongorongan am bitineti ke am tia mwakuri aika a kai riai ni kaukaki nako taekai n aron ariaia ae a kakabongana, ni ikotaki ma ariaia ni karaba, n te intanete ke tao rongorongan aia bangke.

Bubuti ni kamwane ibukin buoka/bwai-n-tangira

Maimwiin urubwai aika a korakora aika a reke man buakan nako ara otawbanin n ara aono aei, n aron 'cyclones' ao angibuaka riki tabeua, e nooraki bwa a rawata bubuti, rinanon meeri n te intanete, ibukin buokaia naake a rootaki man angibuaka aikai.

Ma, imwain ae ko waekoa n anga am buoka/bwai-n-tangira, kawara moa te tabo n reitaki iaon te intanete, ibukin nooran ariaia botaki aika a angaanga buoka/bwai-n-tangira, ao n taibina aran te botaki ni ibuobuki ane e roko ana bubuti anne n te tabo ni kakaae n te kombiuta ke te 'browser'. Ko na kona ni kunea bwa e kaokoro arana are e oti n te tabo n reitaki anne ma are e koreaki n te meeri ni bubuti te mwane ni buoka.

Kinaakin bubuti ni kamwane ibukin buoka/bwai-n-tangira

- Ngkana a roko iroum meeri ke rongorongo man bootaki n angaanga te buoka/bwai-n-tangira aika ko tuai man ongoongo taekai maimwaaia ke ko tuai man rereitaki mangaia, tai kaekai ao n aki kaukii naba taabo n tooma nako iai bwa akanne kanikinaean bubuti ni kamwane n aonikai.
- Bubuti bwa ko na kanakoa am buoka rinanon kambwana ni kanako/kaoki mwane n aron te 'Western Union' ke te 'MoneyGram – akanne bon aanga naba ni kamwane aika a batu ni kakabonganaaki n taa iakai n tain meeri ni kamwane n aonikai.
- Ngkana e aki moanaki aran te tabo n reitaki iaon te intanete anne ma <https://> ('s' anne e kaotia bwa e mwano), nanona e aki mano te iteraniba anne, ngaia are te botaki are e roko ana bubuti te buoka/bwai-n-tangira rinanon te tabo n reitaki anne e bon bae naba n ae te botaki ni kamwane n aonikai.
- Botaki aika a nakoraoi ibukin karekean buoka/bwai-n-tangira, a na bon kukurei n taa nako ni buokiko ni kaotii aanga n ibuobuki riki tabeua, n aia tabo n reitaki iaon te intanete ke rinanon te tareboon, aika ko kona ni kauai nanom iai. Te bootaki n angaanga te buoka/bwai-n-tangira ae e kewe, e na bae n aki kona ni karaoa ae aiaron aei.

Waaki ni kamangao, ni kamwane ao n aonikai iaon te Intanete

Waaki ni kamangao, ni kamwane ao n aonikai iaon te intanete e a taotira ngkai ma ni kanganga aron totokoana ma katokana. A kona ni kaoti ke n roko n aaro aika a kakaokoro n aron tain meeri n te intanete ao ai taabo n toma n te 'facebook'. Aikai aekan nako waaki ni kamangao, ni kamwane ao n aonikai ae ko riai n tararuai ko maiai.



Bakaaean te riki n 'CEO' ibukin te kamwane n aonikai

Te mwakuri ae te bakaaea te riki n CEO ibukin te kamwane n aonikai e riki ngkana te meeri ke te maroro ni kamwane n aonikai e bakaaea te kanakoaki mairoun te mataniwi n te tabo ni mwakuri (CEO), te Manatia n tararua ke temanna maibuakoia manatian ke taan tararuaa te tabo ni mwakuri anne. Tiaki ti ngaia ma e bon bubuti naba kabwakaan te mwane nakon temanna mai tinanikun te mronron ke bon nakon temanna maibuakoia bwakuaukan te tabo ni mwakuri anne.

Kinaakin bakaaean te riki n CEO ibukin te kamwane n aonikai

- Meeri n te intanete aikai a aki toki n taa nako n tangira kabwakaan te mwane n te bong naba are e reke iai iroum.
- N angjin te tai ao meeri aikai a roroko n te tai are e nakonako iai are bon te manatia ke te mataniwi ni koaua, n te aro are e kangaanga iai anaakin koauaia.
- N tabeua, e rimwiaki te meeri n te tareboon mairoun are aangko a na kabwakaan te mwane, ike e kabwarabwaraa iai taekan te bwakamwane anne ae e bwanin.

